

## Script Of Morning Gojri News Bulletin 21 June 2024 at 1015Hrs

ما رنینگ گو جری نیو ز بلیٹن مو رخہ 21 جون 2024

\*\*\*\*\*

یوہ آکا شوانی جموں بے محمد مبارک ماہرتیں خبر سُنو۔

### PM Yoga Day

یو گا غو 10 واں عالمی تہاڑو اج مُلک پھر مانہہ مانیو جا رہیو بے۔ مرکزی تقریب سرینگر غا شیر کشمیر قومی کا نفرنس مرکز ایس کے آئی سی سی مانہہ منعقد ہوئی۔ اس تقریب غو آغاز جموں کشمیر غا ضلع سرینگر مانہہ وزیر اعظم نریندرمو دی غی قیا دت مانہہ ہوؤ۔ اس موقعہ ور جموں کشمیر غا لیفٹنٹ گو رنر منوج سنہا، مرکزی وزیر پرتاپ راؤ گنپتراؤ جادھو تے کئی دوجا معززین نے وزیر اعظم غی سربراہی مانہہ اس تقریب مانہہ حصو لیو۔ عالمی سطح ور یوگا غو بڑا پیمانہ ور اثر رسوخ غی عکا سی کرتاں واں بیرون ملک سفارت خانہ تے بھارتی مشن تقریبات مانہہ شامل ویں گا۔ اس بہرے اس تہاڑو غو مرکزی موضوع ”اپنے اور سماج واسطے یو گا“ یعنی ”یوگا فار سیلف اینڈ سوسائٹی“ بے۔ اس تقریب غو مقصد یو گا غی مشق غے ذریعے عالمی صحت اور تندرستی نانہہ باہدہ با رہے پیغام لے جان آلا ہزاراں شرکاء نانہہ اکھٹاں کرنو بے۔ اس موقع ور وزیر اعظم نے جسمانی، ذہنی تے روحانی نمونا نانہہ باہدو دین مانہہ یوگا غی اہمیت نانہہ اُجاگر کرتاں واں دُنیا پھر مانہہ اُن لوکاں نانہہ مہا رکباد دتی جنہاں نے جشن غا حصہ غا طور ور یوگا غو مظاہرو کیو۔ وزیر اعظم نے کہیو کہ پوری دُنیا مانہہ یو گا کرن آلا افراد غی گنتری مانہہ لگاتار باہدو بو رہیو بے۔ یوگا غا فائدہ مانہہ شمولیت نانہہ متا تیں متا بنان غا سلسلہ مانہہ وزیر اعظم نریندرمو دی نے تمام گرام پردھاناں نانہہ چٹھی وی لکھی تھی۔ جس مانہہ زمینی سطح غی شرکت تے دیہی علاقاں مانہہ یوگا غا پھیلاؤ غی حوصلہ افزائی کی گئی بے۔

\*\*\*\*\*

### PM Modi Kashmir

گذشتہ روز وزیر اعظم نریندرمو دی نے کہیو کہ جموں کشمیر مانہہ اسمبلی انتخابات غی تیاری شروع ہو گئی ہیں تے تاواں ہی جموں کشمیر غو ریاستی درجو بحال کیو

جا ئے گو۔ یاہ گل اُن نے ایس کے آئی سی سی سی مانہ منعقد اک تقریب سنگ  
خطاب کرتاں واں کہی۔ بروبر تیجی واری وزیر اعظم بنن تیں بعد وادی کشمیر غا اپنا  
پہلا دورہ مانہ وزیر اعظم نریندرمو دی نے جموں کشمیر غا لوکاں نانہ اسمبلی  
واسطے اپنا نمائنداں غو انتخاب کرن غے قابل بنان غی اہمیت ور زور دتو۔ اُن نے کہیو  
جے وہ تہاڑو دور نہیں جد جموں کشمیر غا لوک نوی سرکا ر اپنا ووٹ نال بناویں گا۔ اُن  
نے کہیو جے دفعہ 370 غی کند ٹہ دتی گئی ہے۔ جس غی وجہ تیں جموں کشمیر  
مانہ اس ویلے جمہو ریت پروان چڑھ رہی ہے۔ وزیر اعظم نے حالیہ پارلیمانی انتخابات  
غا حوالہ سنگ گل کرتاں واں کہیو کہ حالیہ پارلیمانی انتخابات غے دوران کشمیر غا  
لوکاں نے جس جوش و جذبہ غے نال اپنا رائے دہی غو استعمال کیو اس سنگ واقعی  
مانہ جمہو ریت غی جیت ہوئی ہے۔ وزیر اعظم نے کہیو کہ اج امن، ترقی غی دشمن  
طاقت جموں کشمیر غی ترقی نانہ روکن غی آخری کو شش کر رہی ہیں۔ خطہ جموں  
مانہ ہوا حالیہ دہشت گردانہ حملوں غا حوالہ سنگ گل کرتاں واں وزیر اعظم نے کہیو  
جے ہوں یقین دواؤں کہ ہم اس طرح غا شر پسند عناصر تے جموں کشمیر غا  
دشمنان نانہ سزا دین مانہ کوئی کسر نہیں چھوڑاں گا۔ اُن نے لوکاں نانہ یقین  
دوايو کہ جموں کشمیر مانہ مستقل امن قائم کیو جائے گو۔

\*\*\*\*\*

## DIG Amarnath Yatra

سی آر پی ایف اُپریشن شمالی جموں غا ڈپٹی انسپکٹر جنرل وویک بھندرال نے 29  
جون 2024 نانہ شروع ہون آلی امرناتھ یا ترا غا سلسلہ مانہ تیاریاں غو جائزو لیو۔  
مذکو رہ یا ترا 29 جون 2024 تیں لے غے 19 اگست 2024 تک جاری رہ گی۔ اس  
سلسلہ مانہ میڈیا سنگ گل کرتاں واں مذکو رہ افسر نے کہیو جے سی آر پی ایف  
امرناتھ یا ترا نانہ احسن طریقہ نال جاری رکھن واسطے مکمل طور ور تیار ہے۔ اُن نے  
کہیو کہ مہارو عزم سلامتی تیں بالا تر ہے۔ اور ہم تمام عقیدت منداں واسطے ہر طرح  
غی آسانی نانہ یقینی بناواں گا۔

\*\*\*\*\*

## Cocoon Market

ڈپٹی کمشنر اُدھم پو ر سلونی رائے نے گذشتہ روز مہلت اُدھم پو ر مانہہ کوکون آکشن مارکیٹ غو افتتاح کیو۔ یاہ منڈی رام کوٹ تیں چینی اور بسنت گڑھ تیں پنچاری، مونگری تک اُدھم پو ر ضلع مانہہ قریب 5 ہزار پالن آلاں نانہہ پورا کرے گی۔ پالن آلا اس با زار مانہہ اپنا کوکون بیچیں گا تے نال ہی کرناٹک تے مغربی بنگال غا خریداراں نانہہ راغب کریں گا۔ جن تیں 90 فیصد پیداوار خریدن غی اُمید ہے۔ واضع رہ جے اس خریداری مانہہ خطہ جموں تے وادی کشمیر غا مقامی خریدار وی شرکت کر رہیا ہیں یاہ منڈی 13 جو لائی 2024 تک کم کرے گی۔ خشک کوکون غی نرکھ 800 روپیہ فی کلو ہے جد کہ اس غی پُرانی نرکھ 510 روپیہ فی کلو تھی۔ جموں کشمیر محکمہ خام ریشم بنان با رے صنعت ترقیات غا ڈائریکٹر اعجاز احمد بھٹ غی ہدایت ور محکمہ غی طرفوں اک بیداری کیمپ غو وی انعقاد کیو گیو۔ جس غے دوران ڈپٹی کمشنر غی طرفوں کساناں مانہہ پرورش غا آلات بندیا گیا۔

\*\*\*\*\*

## Chenab Bridge

گذشتہ روز بھارتی ریلوے نے جموں کشمیر مانہہ دُنیا غا سب تیں اُوچا چناب ریل پُل ور 8 ڈباں ور مشتمل میمو ٹرین غی آزمائشی دوڑ کرائی۔ اس قدم سنگ کشمیر مانہہ ریا سی تیں با رہمولہ تک غا رستہ ور ریل خدمات غا آغاز غو رستو ہموار وے گو۔ اک بیان مانہہ ریلوے وزارت نے دسیو ہے جے یاہ آزما ئشی دوڑ رام بن ضلع مانہہ سنگلڈان رام بن تیں ریا سی بشکا ر 46 کلو میٹر لمی بجلی لائن سیکشن اور 40 کلو میٹر فی گھنٹا غی رفتار سنگ کرائی گئی۔ واضع رہ جے یاہ پہلی ایسی ریل تھی جس نے ڈوگا تے بکل اسٹینشاں غے بشکارشاندار پُل نانہہ پا ر کرتاں واں دریائے چناب پٹی جھیڑو دُنیا گو سب تیں اُچو ریل پُل ہے۔ اُدھم پو ر سرینگر بارہمولہ ریل لنک پروجیکٹ جس مانہہ 48 عشاریہ 1 کلو میٹر بانہال سنگلڈان سکیشن وی شامل ہے غو وزیر اعظم نربندرمو دی نے رواں بہرے 2 فروری نانہہ افتتاح کیو تھو۔

\*\*\*\*\*

اس غے نال ہی خبراں غو یوہ بلیٹن ختم ہوؤ۔